

江
西
詩
徵

江西詩徵卷八十二

南城曾燠賓谷編輯

國朝

胡翹元

翹元字羽堯樂平人乾隆二十六年進士著有澹

園詩鈔

舟過瀟磯

挂席渾無恙危檣定晚風釣槎橫水際斜日亂山中樹遠
人煙綠霞明鳥背紅匡廬峰九十俯視一何雄

帥光祖

光祖奉新人乾隆二十六年進士

江西詩徵

卷八十二

國朝十八

奉檄入志局次昌黎南山詩一百二韻呈余明府兼
東同事諸君子

圖經啟元秘山海矜藝圃詭怪紀窮荒至理妙尋究邦志
掌內史版籍惟王授九州若星羅一一靡遺漏背聞輶軒
使問俗所經觀星躔畫疆野區域互犇湊採風辨宮羽聚
米埒圖繡豈徒鶩廣遠治道此通透祖龍奮秦炬湮落遺
簡茂置郡如犬牙參差列屏岫古意亦已眇相因久遷就
紛紜似冰裂錯雜同鳥喙職方記殊趨十道異頑秀編譜
謬三豕重沓類四耐詎止汗牛馬更嗤作詭覆著書一何
難卓犖誰傑構河渠稱史腐志地珍沈痼

聖朝統寰宇聲教溢遐宙車書集紘紼文治匪雕鏤亥章

勞趾步萬里踰廣表揚州古淮海禹貢占斗候篠蕩敷菁
華鵠鷺飛羽遶九江匯西南形勢占丁戊厥水曰章貢探
源出乾寶西山勢蜿蜒飛泉自鳴漱山川舊吳楚風習猶
雜糅於赫制府公榮戟森清畫勛華泐彝鼎巧業薄浮漚
陳詩採吐豎馴俗被猿狖折衷會羣言中立迴不仆下邑
本巖壤樸略譏莠陋譬如望宮牆可以窺美富館局効編
摩廼復及下走撫心懼越俎仰德欣在宥玆珎雜瓊玖賈
用知不售還疑襪線短勉力絕旁祐披圖覽前代頗訝涉
塵垢濫觴笑玉卮止咎慚井甃茫然莫稽疑矯首空恂愁
粵維古海昏淮南邑名舊徙置潮神龍遷分亦云又其北
曰龍山鳳皇若蹲踞登高瞰萬井體尊孰能寇迤西爲華

林鳥道絕攀救側聞正德際巢賊比饑餒廩兵越數載敷
功未聞奏烈哉周吳死遺節表岷貳稍北歷巔岼百丈茲
邂逅縱目盡全楚遐矚勞頸脰唐宣亦訛傳鄙事駭愚耆
卽今重

宸章金碧麗簷溜勝跡用以彰弗煩記反復河源此東注
馮水出其右長橋偃晴虹鯉石攢介胃川原斯以曠無事
嗟避臭精華所鍾結盛美洵足副韋編紛遺忘脫簡飽題
馳徵文探秘檢攷獻諮髮皺太史尉建昌拒簪稱善關誠
齋本儒者著異馴雉雒寓公仰濂溪蘇黃轍相輳繼迹者
誰子劉左軼馳驟甘棠蔭崇柯俎豆芬祠佑立懦資高標
砭俗賴針灸畢然望前哲鐘鼎訪遺籀在唐代永明詩人

似雲逗春虛起新吳學古以爲辦江東本漢域外展得疑
購展轉類喻乳淺學嗤誼譎在宋稱時夫九經重童幼韻
府事排纂援據頗不謬迄今學士家什襲寶釘餽卓哉西
山老賁志埋棺樞勤王奮戎馬議禮辯橙桓孤忠痛攀揖
巨識允搏跌在明號多材南鳥羨匡鷺宋蔡六卿長清望
相先後余鄧矢批鱗勁節終永留賤子釋史傳喟然憤
搆緬惟先中丞借劍稱領袖如何年命乖竟爾泣西待選
馮念前微掩卷一搔首

皇代誕文教盛氣鬱饋餽光天倬雲漢有美期必收所以
彈丸上亦得備寵數余侯惟楚材爲政茂薪樞探古洞觀
火決疑封分繇鼎鼎一百載際運當復姤發凡盛規矩鉅

典茲以遘始聞讀九邱終信羅列宿驚駭嗟凡乘棧豆驚
上廐豈謂叨湔拂塵濁更明琇篝燈坐清夕仰首瞻屋霑
傳草三百奇萬言自愧慙魏穢固自矢劉長敢云懋閱月
兩甲癸經理費營膝迫逐感萃公道德珍勸侑珠璣紛滿
眼自顧心已疚願言托毫穎幸或免詛咒敝帚夫如何干
余笑酬僦矢詩擬拊盆風味還自嗅詎敢嬌醇美無勞日
三酌

何飛熊

飛熊字渭輪號南溪金谿人乾隆二十七年舉人
官定南教諭著有南溪詩鈔

淨慈寺

白雲一徑鎖禪關，斷塢殘峯杳靄間。
紅樹蕭蕭人不暮，鐘落日滿空山。

歸舟口占

回首寒山落照偏，亂峯飛過雨堤前。
清波門外芙蓉水，愛惜西風又一年。

絕句

故鄉何渺渺，歸夢入殘秋。
莫漫吹長笛，西風古戍樓。

夜坐同黃秋水家學乾感賦

高館蟲吟鴈有聲，不堪憔悴聽分明。
疎狂偏向愁邊重，壘塊翻從酒後生。
秋草荒荒埋故國，更籌細細急孤城。
尊前兄弟經宵話，月冷燈殘不盡情。

江城寄懷元竹邨

夢繞寒山共爾行
醒來空對舊燈檠
階前細雨蟲爭響
天外長風鴈一鳴
感慨便成中夜起
低回偏動隔年情
扁舟江閣分攜處
無數黃花恨轉生

畫嶼

漠漠鴈來天
蕭蕭江上水
煙深郭索行
雪重蘆花靡
沾酒棹船回
寒潮沒沙嘴

酬別元竹邨

蕭瑟楓林逐倦鷗
西風回首惜年華
書殘元閣秋燈苦
酒約旗亭暮雪斜
斷燕孤飛憐舊壘
啼鳥三匝嘆無家
祇今賸得傷心句
吟向山巔與水涯

周肅文

肅文字履剛號坦齋金谿人乾隆二十八年進士
官南康府學教授

次韻陳青柯太守洪兩山廣文遊青雲峰却寄

兀坐廣文壘江光窺朗澗別渚攬飛蓬中洲寒宿莽芙蓉
隔江花香酬色不枉拈芳正在茲貽美已云曩恨未接麾
幢高軒寄遐想緬思鵝湖賓更訪鹿洞長青城有寄書問
訊神欲往拾翠虎頭洲遊仙慕殊賞

城南最高峰環望多佳趣山中青桂花山上青楓樹五馬
駕雙鳬好景四面赴漠漠金樾煙迢迢玉京路蓬萊左股
山竟欲飛車駐相期拾瑤草羣仙爲庇護雲將海上遊

躍斟香醑爛醉披天閭美人未遲暮

吳森

森字鳳章號雲衣南豐人乾隆二十八年進士官
廣濟知縣以坑直忤上官罷任歸著有筠瀾詩草

古風

巨壑藏纖鱗圓沙蟄蛟蜃化工無棄物羣動遊蠢蠢淮陰
天下才登壇鬱風雲當其辱胯下何異尋常人深源徒東
陽書空但咄咄回憶捉塵談山林頗傲兀二子易顯晦壽
昌難預期治忽在得人所貴特達知

日月如轉燭歲事忽已闌梁園舊賓從長揖青雲端落花
不上樹流水不歸山故人意氣重贈我珊瑚鞭此物不足

貴但感會而難離鳴晨星稀對酒嘿無言

和陳凝齋先輩舟至江東欣然感賦元韻兼呈劉西
渚同年

何分西陌與東阡塞北江南總客邊白鳥斜飛紅蓼岸青
山半入碧羅天一春雨夢三生話百衲琴心五戒禪潮打
風圍供物色清詞應共曉霞鮮

秋杪自京歸湯九思郭贈詩依韻奉荅

并序

庚申余讀書琴臺山思郭居址數武乃定交山名
馬退以唐獨孤及初晴抱琴登山賦詩得今名是
歲先子作琴臺醉月圖以及詩酒勸白雲句爲韻
凡五章故落句云云

北里笙歌綠夕煙
泥鴻影撇又經年
數行紅樹當窗見
半壁青山入夢懸
肝膽不因流輩露
文章可許後人傳
暑扉無恙窪尊在
愁煞澄江月正圓

送已軍

四海飄零一夢醒
燕山秋雨感平生
澆愁酒爲懷人盡
賣賦金因結客輕
風轉雲帆歸白下
月明香霧長黃精
棲霞老去孤筇在
不是眞仙莫送迎

鬱孤臺晚眺

一名望闕下有武穆廟

水遠山圍翠幾堆
秋清向晚獨登臺
試看直北關河壯
會遣征西壁壘開
五嶺塵沙天外落
萬家砧杵月中來
詩成我欲憑虛去
木客無端勸酒杯

登回龍閣

傑閣倚高岡平蕪見夕陽片雲歸大庾一水滙清章夜鐸
回龍塔秋鐘選佛場南來霜信早琴劍尙殊方

初抵虔州寄沁墅

三年去就省離憂重挂偏提作遠遊噩夢幾回飛楚塞征
帆一夕到虔州天開圖畫雲峰峻地拆東南翠黛浮君對
羣山相憶否西風殘照試登樓

登吹臺故址

驚人愛謝朓好句今誰攜我來訪遺蹤颯颯靈風吹嶽岑
望艮岳剝蝕餘穹碑高臺跨鴻濛下見孤柱欹長嘯誰慨
慷飲者眞吾師

江西詩徵

卷八十二

國朝十八

七

問月樓

太白流夜郎
月夜鵬此

江湖半落長爲客詩酒清狂復此樓萬古同看山月小一
峰中斷楚天秋

諺有巫山十二峰
一峰落施州之語

文人未必都無賴雪涕

何時得暫收沉芷澧蘭爲誰薦烽煙正在海西頭

客有讀放言詩憐其工而窮欲作吉語爲壽者不及
終篇而去戲爲續成

天家雨露待宣旬顰遣江湖作散人谷口紅泉婪尾酒松
陰白鶴到頭身回舟幸不亡三篋投老還應洗六塵記否
陶潛歸去後飄然風貌一綸巾

玉立亭亭邁等儔上書高揖富平侯尋常對客能青眼五
十歸田尚黑頭小戶不嫌鸚鵡杓前身應住鳳麟洲問渠

脚底雲生石海嶽名山一夢遊

古興

楚娥怨遙夜高居樓上頭涼風澹新月盈盈珊瑚鉤樓前
貞女花樓下善女湫新妝倚虛幌無人悄含羞鴉鳥不我
諒擊鼓彈箜篌嫁爲豪家妾日夕悲哀禍守分安義命啼
笑生愁尤紅顏泣青鏡悔不棄道周目送雙鴛鴦飛飛過
蓼洲

東柯述懷簡胡岱峯兼示同學諸生

金碧峯高駐鳥遲說難何必笑韓非鏡中白髮欺人甚湖
上青山入夢稀

行殿春風甦綺壤孤臣雪涕濕重幃

今春迎五臺山

駕

因君強

起無他技試整毛錐再合圍

夜泊有懷

良夜碧沉沉山深復水深平沙虛澹月高樹隱清砧別緒
在邱壑曠懷成古今衙官誰屈宋觴詠答猿吟

野鷗

不得同漁父何緣狎野鷗夢回仍抱水煙重暗驚秋海國
無機械蓬臺尙阻修塵纓如可濯浩蕩與天遊

夜泊南城

輕舟泊遙夜夜景清遐心衰草忽碧色萋萋非故林危橋
隨柁轉涼月入杯深欲問麻姑路荒雞與漏沈

魯鴻

先生字遠懷號厚畚新城人乾隆二十八年進士
官孟縣知縣以同知致仕歸遷居南城日以吟咏
爲事煥年十六時嘗從受制舉業著有厚畚詩稿

古風

高第薄層雲詖蕩天門側詔下賜將軍壯哉萬古宅豈知
昔時人曾此宴華客愛女羅燕趙新聲動顏色快意極歡
娛驕盈氣蕭瑟花鳥不知愁春風自今昔山中雲爲狗天
上星隕石徒問露車人感嘆此何極

一鏡秋臨水微風蕩輕舟攀荷摘其實欲贈良悠悠藕絲
何太長蓮心何太苦心苦難分明牽絲淚如雨唯應荷葉
鮮可共鏡中語

喜凝齋章江言旋

正是懷人候秋風客到家三年新白髮九日又黃花與爾
同樽酒含情向水涯迢迢今昔夢萬里溯三巴

感遇

空林滿幽色及時足光榮持此薦郊廟素心深自盟美人
不復來搖落竟無成春風如有恨何事揚芳英

蒼蒼青松林鬱鬱寒雪岑結根自孤直焉知匠氏心安榴
來海上枯桐發清音怡人耳目間梁棟詎足任

桃源非辟世世自辟桃源流水如有情花片落人間仰視
飛鳥外悠悠無可言漁舟去不返千載空雲屯

題似山五雲山房用工部遊何將軍山林韻邀潘莊

楚秀方同作

竹徑高臺出層軒四而開千秋亭上酒五月笛中梅遠水
環山盡晴雲帶雨來蒼茫煙柳積瑣屑亂莓苔

步屨春風裏閒花到處香輕雲過水濕殘月下山京路失
遺樵辨林深古寺藏扶筇能濟勝潘岳鬢毛蒼

聞祝人齋將由章門赴粵却寄

無因握手去懷抱幾時傾有子愁爲戒緣君喜更生春風
南浦驛細雨五羊城遠夢殊漂泊驪駒且緩征

哀樂中年事端居颯似秋風塵更鬢髮離合似羅浮各有
家室累而懷天地憂章門一尊酒遣我迴含愁

阻風仍泊東流次韻

潯聲洶湧客心寒白浪高于八節灘落日孤城荒野岸廿
年三宿阻江千夢回鷗鳥同漂泊氣奮蛟龍尚鬱蟠徑欲
揚帆窮萬里乘風長嘯海雲寬

擬古行路難

日月萬古天江山萬古道日東月西去堂堂山北江南別
草草江山風景如曩時日月銷沉此中老水宿風餐懷苦
辛行踪火急捉義輪豈知出門便有礙怪雨盲風愁殺人
君何樂此輕鄉里飢來驅我豈得已鄉心夢繞故鄉水水
中魚龍怪君頑戲弄波濤興未闌嚴霜一夜凋朱顏請君
破涕歌此曲孤鴻驚窠元猿哭不見伊人在空谷朝杖藜
暮秉燭閒居日月懸壺中信美江山當戶曲懸車東馬兮

早歸來相與對酒酣歌貧亦足

秋日文讌

冷官有期會雜沓羅衆賓相遭淡與泊灑然清心神昨來
憲府檄歟忽喧城闔右職率奔走前驅安足云伊子獨何
爲興與文翰新從遊二三子曠若山人豈敢托高躅養
拙自遺氛秋氣日以佳觴詠及茲晨同心易取醉頽然墮
冠巾坐客行欲歸華月滿前茵

龍河書院卽事

別業依城北蕭然水石間有時招月醉盡日看雲閑煙雨
門前渡牛羊屋上山隔林聞犬吠鐘定有僧還

涂寧先

寧先字致遠號繡峯靖安人乾隆二十八年進士

古意

朔風千里至迢遞起層陰出門野躊躇淒淒感客心長嘶
遠征馬哀鳴空山禽撫時傷物變浩然發長吟執袴不餓
死雞鶩徒相侵蓬蒿守其賤高堂彈鳴琴寄懷在山水雅
調刪哇淫狂歌當日夕萬象森沉沉

望嵩嶽

乾坤結奧區靈元氣難束拔起最天中巍然勢成獨羣山
莽迴互各自效奔逐煙雲縹緲間略辨山之腹長巖勢飛
動未能知凌曲看山似讀書宜漸不宜速驟覩層巒改乍
見晴嵐瀟是時當春明青翠若可掬雨過廿四峰層層相

向緣康樂興自深不在窮川嶽寄語風塵士胡爲自局促
登嘯臺

孫生旣淪跡沉醉臥秋風高情遺萬物而不與俗同登茲
忘百憂長嘯振華嵩寂寞千載後長天來遠鴻下有泉水
清潺潺濯崆峒蘇山峙其側怪石摩高空鏗然鸞鳳音隱
隱白雲中慨念昔時人瞻望渺難逢颯然靈籟起餘響迴
丹楓

晚渡黃河

行色驚秋暝征人急遠程星飛滎澤口水落汴州城野火
呼人渡煙光拂浪生臨流一回首千里夕雲平

重渡綠灣河

匹馬棲遲復此遊
臨涯望斷客心愁
擔簦人背孤城去
賣酒船隨夕照流
柳意不知征馬苦
雁聲猶帶玉門秋
此身漂泊知何益
愁見煙花滿石頭

彭廷簡

廷簡字上拔清江人乾隆二十九年歲貢

過萬竹庵

佳辰開法會
禮佛過禪林
鐘磬搖花影
旛旌帶竹陰
山寒秋氣肅
寺古暮雲深
漸見鐸龍長
堪知天地心

陳守誠

守誠字百常號恕堂新城人官浙江金衢嚴道

效阮公詠懷

幽居謝塵擾獨坐鼓瑤琴紆鬱滿中懷戚戚淚盈襟達人
尙高潔好鳥棲茂林徘徊今古間悠悠思我心

庭中來好鳥不語空翱翔身首皆文繡高啄求芬芳時哉
得其所觀者不能忘詎知弋者慕增繳藏中腸一朝置籠
中摘羽於瑤房感物得世情使我心自傷

結廬在湖西滿園種桃李春來發舊花豔麗正茲始奄忽
降嚴霜衰隕同荆杞所以青松枝結根南山址仰觀白雲
流寄謝繁華子人生無所樹蓋棺長已矣

西方有美人溯洞在岑陽江水作明鏡波搖珠翠光垂頭
有所思仰見月如霜纖手拾瑤草羅袂褰秋芳取書欲寄
遠微風吹薄裳登高一長眺安得凌雲翔殷勤謂雙鯉君

子心難忘

抗志五嶽遊牽車涉遠道仰視玉霄中浮雲不自保渺渺
祖洲前有人種芝草滄海幾變更麻姑顏未老鳳皇食丹
砂長見毛羽好

匣中吐光芒神物惟太阿躍出鳴天半留霍雷風過當其
伏泥沙嘗恐韜晦多精靈能自見寶氣衝星河張華誠難
過往復爲悲嗟

秋風下庭樹明月臨我帷夜色正蒼蒼蛩鳴聲益悲我懷
亦如此知者其爲誰仰見河與漢西流多寒暄六合信寥
廓斯身將焉歸

獨倚高樓上傾耳聽浩歌白日自相催迅速如電過人生

百年內忍使空蹉跎精衛難填海漉漉奔江河男兒生世間缺陷常恐多悠悠終此身回首當奈何

思我同心者羨門隔雲外江上日登樓披襟長散帶遙見芙蓉姿零落與風會托根苦不堅乃爲狂飈害寄言與佳人豔質終難賴

四顧無所托置身白雲岑昔有放蕩者飄然歸竹林論世頌其詩相對如披襟寄想於其際睥睨高柳陰長嘯起蘇門千載緬遺音隱諷在毫素是用寫我心

醞釀在天地維世賴書詩其理窮益見皓首無盡期白駒不可繫百年勞所思思得端倪會悟於一時出門常四望道路將安之傍徨對形影褰帷還自嗤

野獸鳴空壑元鳥巢高梁物生異其所南朔天渺茫有懷
空自見無翼不能翔黃姑與織女隔河長相望皎潔懸明
月凌厲垂秋霜此情苟不薄風吹心自傷

結契膠投漆此心不可移西山勢蜿蜒白雲心逶迤鹿鳴
思野草縱足欲高馳君子有深意世人安得知隴頭聽流
水所感爲別離

獨立於門前有客歎無衣四顧路茫茫羈窮失所依大造
幹元運斯民何獨飢榮枯任百卉孤雲竟無歸感此彌怆
惻凜凜朔風悲弓矢誰倚竹翡翠難奮飛錢刀奚足恃末
路亦同歸

出門不同途皆爲行路者紛紛世間人息吹如野馬飈飈

山上鹿啣草鳴於野我求採芝人久坐空林下觸物結中腸有懷安能寫

風塵徒役役所遇靡知音英華挫折盡行藏雨浮沉嫫母喜謠詠翻謂貞者淫長嘆高臺上野風吹棘林

秋原見蔓草駿馬鳴中林霜蹄日維繫不獲使駸駸物微免所忌狡兔得其心此懷正惻惻其雨何淫淫蛟龍藏首尾神化孰能尋風雲時出入感喟不自禁

題魚亭遠眺圖

伊人隔秋水獨立山之巔仰視白雲流往者不復旋萬類各有依之子何脩然人事固艱險窮通無足牽努力存斯道聊以完吾天

送潘雲五比部之武寧

沿堤新柳綠折柳登高樓江上一泓水送君千里舟好風
東南起微雲西北流行子在中望無言心悠悠桃李爭芳
節蘭若眷芳洲物性固非一人生各有求

晚泊樵石遊報恩寺

帆落江風息漁喧網索開夕陽過野渡明月到高臺山色
水中見雁聲天上來晚鐘鳴古寺有客獨徘徊

望湖亭晚眺

水國鳴黃葉亭皋集暮鴉日沉孤客眺風起亂帆斜鶴雀
團蒼樹龜鼉走白沙漁人識天色高臥在蘆花

贈潘清宇歸汾水

登高一長嘯悄然心自悲芳草綠已遠春華繁所思置身
天地間千載以爲期願君惜毛羽晨風雙翼垂

樂三省

三省字曾約號一峯一號睡僊金谿人乾隆三十
年拔貢官貴溪訓導著有趣園詩集

夢起

夢起春衣見酒痕爲憐棲燕早開門濛濛花氣和煙聚泥
泥溪流帶雨渾白壁投人心自恥黃金結客事難論藏身
幸有三間屋更在城東水竹村

行路難

絕國乃非遙階前卽萬里驅馬未出門謗聲已入耳蜀山

萬點高崔嵬隔絕瞿塘灘
潁堆眼前有路那得過
不須更問何時回

野田黃雀行

春草青連水秋雲黃到天
燕飛社雨後雁叫寒霜前
良苗不可棲遺穗不得啄
時時避網羅處處依蓬藿

采菱曲

赤欄橋下湖光綠菱葉浮波剪碧玉
瓜皮艇子櫂輕風雙鳬飛過南隄曲
阿儂慣折門前柳那知菱刺傷儂手
殷勤采此欲遺誰歸來脈脈當窗牖
昨得黃耳竹筒書知郎早晚離東都
井梧瑟瑟秋聲急只恐郎歸菱已枯
君不見菱花妝鏡依然在
不似當時有光彩

遣意

春來曾幾日又是落花時亂夢從胡蝶閑愁屬子規曉風
眠起晏暮雨醉歸遲遣意須如此旁人恐未知

惆悵詞

春風在東園美人隔花窺花間蕩子去花外飛黃鸝芳心
久秘惜姊妹曾不知願覲絕塵土同結終身期尋常隱簾
幙目遇心已非身有雙玉珮藏在金縷衣惆悵復惆悵此
生當貽誰

錢塘

春風一棹倚雙高漠漠春寒凍濁醪天壓層城雲作蓋江
通大壑雨如毛錢王弩斷蛟鼉出宋代園荒鳥雀號千載

孤忠餘氣在猶能呼吸起奔濤

舟泊錢塘與同人約遊西湖值雨不果

十年曾憶西湖好今過西湖願又違
無限青山看不見空江煙雨滿船飛

平山堂作

道是淮東第一觀名賢勝跡且盤桓
便同峴首思羊祜長擬東山屬謝安
霞曳斷紅藏碧水風搖新綠上雕闌
隔江金粉知何似今日登樓着意看

都中和友人留別

客從海上來傳語蓬萊好仙人雲葉冠
騎鹿踏瑤草低風入下界蕭蕭吹蓬葆
顧見塵際人驅車在中道聞言不敢

行躑躑傷懷抱

霄漢羅列星其光叅日月君子志古人凡情詎所屑功名
身之餘未須寸心熱世趨日以卑斯言期一洩持此贈君
歸庶幾規所闕

留別都門諸友

尚對燕臺酒相酬各盡觴前程雲壤判後夢水天長白屋
身無恙青輿道不妨他時誰見訪須問輞川莊

彭蠡

已盡長江險秋水更寬沙光團日白樹影隔波寒雕鸞
桅尖下蛟龍枕底蟠匡君猶送客百遍轉頭看

化龍石

鴻者化不還延平化無迹奔湍片石沈風雨人猶識

桃花灘

灘石尙隨流落花聚何處分明棹舟來不是武陵路

叫巖

風雨響空巖江聲共鳴咽行人曾不聞叫破山靈舌

瑞洪鎮

斜陽落水山容好五年三過瑞洪道湖光一片蕩雲飛肅
肅西風響秋草歸鳥入暮繞桅竿漁燈亂點蘆花灘舟子
臨眠約早起今宵月出旁無闌長途幾日風波息况復青
蓬添夜色孤鴻無夢落平沙來聽船頭吹短笛

西齋遺興

薄宦猶能而目真清風到戶榻無塵不諳世態寧非拙若
信錢神未合貧曉露研硃親課子夜燈淪茗自留賓病來
舊業拋荒甚憶得忘書似故人

晚遊叫巖寺秋雨新霽放舟乘月行三十里

叫巖山下舟初艤叫巖山頭雲未起雨洗空沙秋滿江遠
色平收三十里一僧仰頭倚巖立客到寺門邀客入桑下
相留曾幾時又見須眉帶霜濕暮鐘鞺鞳散高空舟人報
說西南風月明半挂巖前樹花宮轉眼煙朦朧一宮冷淡
隨身在夜氣迷茫似滄海人生快意只須臾風月滿天常
不改

小園

和風遲日散餘寒
淺綠深紅取次看
料得東皇憐冷淡也
分春色到閑官

贈吳生澂遠

薊水吳生能好奇
手持寸鐵如毛錐
小者蠅頭大狸骨
鑄之竹木無不宜
名刺一投情已洽
爲生開軒掃塵榻
自言此藝無師傳
小技雕蟲用我法
撫寫鍾王亦有神
刀鋒所就尤逼真
得生一器置座右
枕屏硯匣生煙雲
我生性癖耽豪素
塗鴉往往得生譽
遂爲弟子從臨池
愧爾家雞學野鷺
片長肯以虛懷收
成茲妙藝良有由
况爾文詞頗豐秀
竹看鵬鷗騰清秋

喜黎慶堂至

狂奴猶故態知已又新歡意氣弦爭直胸懷海共寬忘形
無主客隨意具杯盤城角冰輪湧同揩醉眼看

月夜寄懷族弟松巖

仙人橋下波聲急藐姑山頭月光入幾株新柳羣鴉喧百
尺喬松一鶴立壁間有琴不可彈架上有書無意看須君
對語破岑寂苦無千里凌風翰君之學行吾宗秀夙昔襟
期獨我厚意氣堅逾膠漆投文章雅合壘篴奏老親勉督
事科名每思躍馬登層城君尙諸生我薄宦各負區區鳥
鳥情藥爐夜夜消殘火我憐君病君憐我交道由來托死
生才名尙擬同擔荷悲來時作還山吟春煙秋樹望雲林
新詩那忍不緘寄只愁苦語傷君心近聞里黨多英俊更

欲憑君相問訊須遣青雲早致身莫教白雪空沾鬢

後圃口號

宛邱學舍小如舟

用東坡句

小步荒園卽快遊雨送微涼應久

夜人經多病略宜秋新紅的的鮮
藪杞老綠搓撻散古楸
何處高樓三弄笛等閑吹起客中愁

盛元績

元績字蒼霖武寧人乾隆三十年舉人

遊柳山寺

野色兼秋淨登高極遠天疎龕藏佛火密樹接人煙一閉
寒鐘迥雙扉夕照偏斷碑題甲子苔綠不知年

鄒玉藻

玉藻號西施奉新人乾隆三十一年進士官湖廣
道監察御史

九日同盛碧秋紉芳蒼霖登西城作

萬井村煙合登臨盡眼收飛帆連屋角匹練挂牆頭野綠

蟲吟晚籬黃鴈寫秋山亭容四望再續魏公遊

地有四望亭韓魏公

謝葉嶺
言處

梅炎

炎字星瞻南城人乾隆三十三年舉人

送鄧二儕白冬日再之楚

一燈照我不成眠閑步中庭霜滿天獨醒怕聞寒漏永孤
蓬轉爲故人憐瀟湘舊感孤樓在風雨新愁半榻懸況是
多情難別處與君攜手到江邊

萬廷芮

廷芮字漢吉號荻鄉南昌人乾隆三十五年舉人授安福教諭著有是陶軒詩藁

題玉京道人彈琵琶圖

梧影蕭蕭下葭闌忽雷按拍玉窗寒就中多少興亡恨莫向江南祭酒彈

不理宮裘理道裘善和坊外是平康江山一度南朝夢猶記當年杜牧狂

過太子庵

入大山人晚年流寓於此

湖光十里長芙蓉一片清風似雨餘綠竹可憐高士宅青山難得好僧居阮公歌哭來歧路張儉飄零到草廬風景

何堪人去後，滿橋容我再騎驢。

次韻寄姬源三姬

南北關河馬跡斜，馮生何事嘆無家。
懸知白草城邊路，青塚年年有落花。

樓櫓煙雨尙霏霏，舊夢空尋萬里衣。
一夜愁聲動秋角，鴈門關上寒雲飛。

慕光行 并序

慕光燈蛾也，感其遇悲其志，爲作是詩。

一聲薨薨落窗紙，紙破燈飛光在几。
有蛾氣盛心勞勞，遠燈高下千百遭。
火光炙身雙翅迫，忽爾性命輕鴻毛。
一蛾方死羣蛾集，電馳塵合聲逾急。
可憐冷燄自徘徊，希光轉

向蘭膏泣古者炎帝燃桂薪以照夜九轉丹成珠佩化不
然髓丹豹屠白鳳淳蘇光透靈修洞神仙富貴但可求獨
憐狗物身如夢我今燈畔牙籤列千古萬古英雄血平生
不貪炙手熱案上之燈那可滅

自題春池夢覺圖

并序

余哭先三兄有詩云小謝夢餘芳草死王孫歸後
子規哀蓋傷螺墩之遊而作也銀陽張星海爲作
是圖諸同人賦詩成帙嗟乎春事年年鵲啼血漬
樹音樓畔忍復作三生舊夢耶乃賦詩殿之以謝
諸同志者

舊恨重拈未忍彈新辭題徧小烏欄獨憐夜夜芭蕉雨不

到螺墩已夢寒

曼調長吟並色絲淒涼誰唱楚歌辭
三生石上支頤坐大是摩挲未醒時

偶感

風高無靜樹湍急多踈鱗剛烈畏火性斯言良有因
君子審駕馭處決貴以神空山定衆響廣漠容纖塵却逢邯鄲兒氣咽不能伸

龍潭禱雨紀事同胡樸村明府

九龍迴御火繼張朱旌旌蓋高飛颺其屬煽虐東南鄉袒身頂目神無常威者季盾屬賓王焦陵沸海肆梟強使我上小居無康今年赤旱千里黃羲和按轡愆諸陽乖龍懶

睡蛟潛藏嗟農有命耕與桑上田兆坼次蕪荒如原初燎
麥始芒饁耨暴烈撐愁腸過河之泣枯可傷誰製錦者古
循良皂衣徒步虔薦觴白日落地僧開堂焦頭破額鴈所
當昔我稽古信荒唐神農占驗野史詳墨黃青赤龍有方
小童甲乙舞且僵我共遵此行雲襪僉曰有壇蹲小岡五
嶽四瀆視公行爲汝請命焉敢迨長吏虔祝熱信香嗟予
官冷職則勦鵝行鴨步民所望途徑險仄修且長臨淄汗
湧珠泐滂僕隸狼顧民肅將止坐跪步相矜莊須臾山勢
如攢羊捫藤帶葛人踉蹌健者濶步高跳梁山腰陡峙心
忽忙但聞吼喘熏喉吭說龍說龍氣翔短垣十版荒無
場鰈宮貝闕宅中央冰須玉面靈清揚我方匄伏民濟蹕

有巫持咒神披猖拔劍斫地聲琅琅高呼窟澤龍所障齊
心并力如捕蝗渴泉徹骨驅鱗魴肥遺六足四羽俟得之
將以壽東皇呼喚風雨資騰驤歸來老稚列堵墻俯伏道
左陳壺漿令我感此增慙惶

太平有道百族昌小災偏膏寧乖妨饑人飽夢刻不忘况
疑未薦新堪嘗龍兮高高通銀潢鞭策雷電來吾疆雨師
颺母交徜徉山山作勢如連檣朱火照耀葳蕤光雲馬奔
驟河鼓喧密絲拖白山轉蒼欲雨不雨天低昂水車夜徹
聲茫茫鳩婦格角啼晴暘不惜鄭俠圖枯甎作詩敢擬雲
漢章

得家書即寄舍姪念亭

鹿鹿風塵際并雲燕樹春十年曾識字一劍恥依人敢信
貧非病翻將宦累親可憐臣少賤負米在江濱

丙戌春暮寄故園諸子

莫將著述問虞卿愁病如今太瘦生炙手可貪中未熟支
頤如懶夢常清長相思是纏綿種古別離多偏仄聲蹶蹶
風塵前日事高歌曾過受降城

家東奮師

閒數厭原第幾峰暮雲官樹碧重重市中此日多談虎世
上何人不好龍五色目眯經古戰一聲夢醒憶殘鐘難堪
最是東軒雪碎劈蠻牋酒暈濃

夏煦園廷儀

少小才名愧馮遷山河博取滑稽緣唇長彭祖皆兒戲背
癢麻姑是女仙

掖曙善談諧故箴之

此日功名看唾手當時人品說

齊眉慚予亦有探春願幾度飛花落舞筵

舍弟廷梧

綠淨園秋夜寄懷李大憇園

園林結構小滄洲萬綠梢頭月一鉤倦客味如新中酒懷
人情似舊悲秋涼風颭拉初歸谷暑雨淒迷乍過樓又是
江湖迎鴈候此時真愧稻粱謀

初夏寄夏煦園

只合頑金鑄閬仙當歌猶得故人憐置書懷袖將三歲作
嫁裁衣竟十年到岸山光看雨後過江人物想風前登臨
是處成陳迹粥飯拋時再問緣

得魚亭訃後追悼一二亡友

聚散如同水上萍知交忽感曉行星一春愁上清明路夜

夢昨經長短亭才子我真疑李嶠酒徒君莫怪劉伶西風
細碎絲何事贏得魚腸枕畔腥

讀彭儀庵遺稿感作因題集後

學詩苦學陶彭澤孤雲無依寒抱石孟王韋柳唐四家逸

豔驚芒白神適我鄉作者寧都彭躬庵草堂雨先生

二公皆易

堂九子中人登壇旂鼓每相埒太羹元酒追希聲儀菴易堂舊

苗裔每有新辭矜古製神駿朝騰逐電蹄令威秋老橫空

唳朗咏微吟偶一過九天咳唾紛滂沱妃紅舊陋元和譜

樂府新醺勅勒歌有時窮作巴猿哭才大賈生空賦鵬湘

南芳杜怨汀洲冀北驤騰空上谷又如天山雪打圍短兵

三尺龍精飛涼州鼓吹胡笳夕鎧光甲電寒無威一聲按

拍河滿子三疊陽關淚如水長短亭邊折柳聲哀吟曼調
情旖旎爲君高歌夾馬營再歌徵生徧仄行杜陵布衣傷
老大史筆却與班范爭英雄出身貴有主萬里依人問嚴

武謂徐石溪先輩瑟鼓王門尚有因簫吹燕市心彌苦當時南村

亦少年先三兄號南村儀菴客都時唱酬最密帝城騎馬看花天黃金臺畔

同懷古宣武門前共結緣書生福相都如此儀庵一去南

村死鬼唱秋墳夜夜哀鵑啼墓草年年紫玉樓著述事悠

悠文章光燄成荒邱只今才鬼紛如蝟唾壺不擊將何求

嗟嗟壺缺終何益儀庵自都歸署其稿曰缺壺狂客山頽金韻擲掀髯

阿大獨當筵雪花如掌長安白集中以雪夜東萬大梅泉之作爲最家兄此時尙牧

三輔
故云

祀真君

禦災捍患者祭法則祀之神仙况忠孝靈爽亦以奇大江
南來控虔粵連山亘水霏靈雪寶煙散作須菩提千門萬
井香篆結昔過射蛟浦言尋生米潭潭中毒霧尙腥臊碎
骨閃爍來耽耽白日回皇走萬怪疑是元鼉赤鯉文蝸月
蚌空際相朝叅鐵柱宮中煙似墨玉隆道上人如織十步
三跪進一香前香初升後香陟撞鐘伐鼓吹笙簫騰沸喧
聞耳乍寒昨者下黃堂旌旂蔽秋野老巫作神言百卜乃
散下黃堂一下神人慶黃雲櫛比豐穰穰神所到處無肯
殃下及雞犬馬牛羊在昔塗山鑄不若百靈效順咸趨將
餘孽東南敢胤胤更千百世煩旌陽食德報功固其所平

成大烈寧荒唐丹鳳啣珠墜秋月玉桂凝香靜不發更聞
拔宅清和時鼠腸拖染原田麥神仙毫光遍大地安歌緩
節交恍惚君不見玉珂龍氣來珠宮生佛萬歲山呼同神
仙舞蹈壺嶠東手弄瓊狄千年銅仙風吹出大荒外萬象
回首清宵中

江右俗傳八月初二日爲許旌陽誕辰吉州
獨於十三日作真君會是日爲
前人夜歡呼之聲與會中鼓樂相聞充溢
閭井蓋神仙忠孝之錫類也故特及之

萬壽慶

紀歲珠

并序

汪子鼎先生餘事集載紀歲珠一首其畧云鄰某
娶婦一月卽行賈婦刺繡易食歲積其餘得一珠
名紀歲珠夫歸婦沒已三年矣槩篋得珠二十餘
顆嗟乎杜陵新昏別傷從軍也若此者所謂重利

輕別離者耶爲效其體

紀歲珠光碌碌一串珍珠泪一斛一歲泪成一珠珠光如
月秋水枯泪在郎心珠在衣與郎泉下長相思

紀歲珠相連復相貫憶郎大刀頭攜向燈前算郎不歸還
無期削葱血出雙柔荑鴛鴦鸞鴛鴦成對飛

紀歲珠圓還折五色縷無斷絕穿珠入篋埋青春語郎莫
示後來人

廬陵女 并序

女蕭氏母寡而貧且無子終其身不嫁以養母焉
母年八十餘女亦年五十嗚呼其志不可及也夫
父兮生我畜我不卒嗟我母兮終焉銜恤 一解 女生無父

女長有母父母無子誰與母守

二解

兒紡母機兒織母衣

母食兒炊母淚兒揮

三解

麥飯一盂年年寒食暮雨啼鵲

兒父之側

四解

四壁燈光灰燼更長女髮則蒼母髮則黃

五解

垂五十年謂我女子宛然孝子宛然處子

六解

祈連

之冰女心則凝我帽之雪母搯其節

七解

吁嗟雪兮不可

穴兮吁嗟冰兮不可凌兮

八解

早秋懷家伯兄保定卽寄

望雲忽自涕先零一葉梧桐下廣庭搖落吟聲秋氣在懽
騰噩夢酒魔醒偶隨法喜天花隊便見神焦鬼爛形昨夜
階頭看北斗一行貫索尚熒熒

詩情客緒兩無聊百尺樓頭氣漸消虛擬少陵祧稷契不

堪玉局祭臯陶孤臣餘喘皆

天賜白首歡情入夢調倘遇環期歸卽好希榮吾已薄金
貂

秋夜夢接家書晨起適至

開緘如夢寐猶作夢中看久客鄉思苦秋風行路難家貧
逢歲儉婦病及官殘搦管知無緒茫茫集百端
遠道易生感十年同此心關河搖落淚風雨短長吟孤雁
猶橫塞樓烏未返林茭莩明日節望遠一沾襟

風樹搖

木蕭蕭兮前浦風策策兮高樹怛予心兮搖搖我思親兮
不得語南山采薇兒食常饑兒寒無衣兒罪當笞吁嗟默

默兮樹之風猶可息我思親兮不再得

廬山

九十九峯何崔嵬九江九水從天來橫空倒瀉一千里盪
搖崖壑聲奔雷五老招攜入雲表見面須眉殊了了來棹
南風去北風半年欲爲匡君老

螺墩九子詩

并序

壬午秋諸同人以試事集省垣舊雨新知屢常戶
外滿一時盛文酒之會而螺墩又其最也螺墩之
遊以詩以地以人與其會者十有四與予稱莫逆
者九人而已昔人云開門各有事非不惜餘歡雲
散風流一別如雨九人者出處不侔踪跡闊絕今

茲發棹章江望螺墩于煙波杳淼間真不啻過黃

公壚欹歎山河之邈若也因作九子詩

君浮弱水槎我鼓瀟湘楫所行各有遇榮名以爲俠君乘

緱山雲我逐漆園蝶造物理則幽悲來不可竭

王仲季延楷

老樹無醜枝秋山無麗雲良禽貴擇木天馬時空羣卓犖

以爲僕旨哉韓子云努力寶令名窮達非所聞

章雲門允登

莫以宮中粧誇示下里婦鼓瑟不如竽失次誰職咎富妻

曳羅綺貧妻習杵臼位置本不殊歡情愜所耦

劉健菴于培

長安貴公子被服紉與素白馬黃金羈相逢在廣路贈我

太乙篇其光射百步自醉廣陵歸故者日以故

熊最甫

大雅久不作知音良亦希彈君別鵠操慨慷有餘悲上言

長相思下言久別離日暮北風多念子寒無衣

陳方偉震初

孔雀愛其翎對客自矜寵鸚鵡愛其聲引吭自囉嘖鳳鳴

滄海白鵬飛大風動物理亦已微吾道在神勇

洪兩山鐘

南國有佳人翛然絕人代秋水剪微波遠山列眉黛珊瑚

七尺裝明珠十斛碎與子忽目成瓊琚解雜佩

吳湘南芾

北山多薇蕨途徑自幽邃十日采一筐五日不得食小婦

辦脫粟大婦質簪珥道逢披裘翁波瀾欣莫二

夏廷儀照園

遠山如靜女可玩不可悅秋士如秋雲坐對無言說我讀

南華篇與子勵清節中道多險阻恩情無斷絕

熊亭茶思笏

再題煦園小照

縹緲空濛幻亦真畫中著箇苦吟身十年世事如羅薄廿

藏功名笑螻蛄伸情種自來鍾我輩業根終古累才人君家
住近厭原麓早起何妨禮玉晨

眼前一桁見嗟我園綺招邀且放歌醉我秋光紅葉在思
君遠道碧雲多原無健翮能摩日不信枯魚且過河只此
白衣蒼狗迹年年塵夢繞山阿

戊戌下第出都門作

一襲襤褸被出蘆溝天氣溫涼似晚秋車馬催人成老大文
章憎命悵靈修酒傾白墮驚蛇影煙入黃鶯撲馬頭回望
長安沙路濶官程無計爲勾留

十年竿木自隨身作戲難分傀儡真強憶賈生初入洛不

堪蘇季又辭秦夢中暇豫枯兼苑

夢開唱暇
豫歌云云

世外酸鹹苦

與辛誰爲此行都孟浪蝸涎蟻磨本因陳

十四日留保陽家兄招同董曲江小飲卽別感賦用

儷紫軒韻

蹴躡塵緇下第身半生京洛不逢春歌當慷慨偏成調酒
爲情懷易中人李憐梨嬌誰作主燕來鴻去自爲賓紫藤
肯爲羈人發莫憶蛛絲學釣綸

臨沼道中

官道直如繩披衣戒夙興頤垣無瓦雀荒寺有齋僧電影
斜欺月晨光淡借燈黃梁真頃刻好夢我何曾

太子磯

廟祀梁昭明太子

臨江東下是臺城水面青螺刺浪橫片石風流傳帝子六

胡人望屬書生青絲白馬謠終驗金掌銅盤露已傾只有
班枝辭賦在南邦終古擅文明

月夜過板子磯

黃左戰處

風帆隨月下危磯石罅鱗鱗鏡面吹壁壘尚存龍戰後江
山應憶鶴歸時朝廷西顧憂方棘艤艦東來禍更奇我負
臨侯殊倉卒可憐黃闔亦男兒

憶昔篇寄沈旣堂夫子

峩峩泰岱雲皦皦廣陵月雲起嶠壺蒼月出天山白神仙
窮天地滄海渺一髮四座且勿喧賤子歌憶昔昔歲在庚
辰我師秉玉節霞帔九子鈴玉皇天上客粟雨慘淒階香
風散雲窟我時負刀圭雙來許通籍羣仙相介紹牙床森

萬笏可憐偷桃兒頭童兩眼碧衆中貪狡猶持矛殿其席
我師曰吁哉怪事殊咄咄平生古戰場過眼眯蒼赤盤硬
或飢鷹迅踔或海鵲謂之老伏櫪安用轅下骨出語迭嗟
悼意氣殊蓬勃弟子終軍歲棄襦亦蹊蹠毛羽始長成矜
寵自超忽帆指章江門雲飛南浦驛日暮廣武筵秋風亂
黃葉班馬時蕭蕭古樹時策策握手一爲別夢境成恍惚
十載知已見欲語不得發雙鯉爲掣尾孤鴻爲鍛翮遙遙
萬里道沉冥判楚越師邀

帝心簡五馬出魏闕吟詩小謝宅玩古黃山碣我亦爲祿
養微官頗中熱淙淙惶恐灘灘灘如積鐵蛟龍所盤踞毒
霧晝明滅頗怪風土惡倏驚大樹折有狗若喪家有豸若

常轍有車不得輪有馬蹄忽蹶茫茫視六合恨無風生腋
肝膽時迷露古劍自格砮千里掉孤舟駭浪冒飄沒夫子
今東山陶鎔大冶設我形因醜醜造請况倉卒見面驚愕
甚豈謂十年別回首滕閣社一一如陳迹更闌尙縷覲語
多聲轉咽脫我塵縑袍解我郎當笈授我新筆札使我事
典謁朝草羽林檄暮馳黃閣牒墨瀋恣淋漓翼書互揉擻
夫子工臨池興酣豎鈇鉞龍蛇百丈飛風雨半空接謂子
體勢乖肘腕况復拙一一爲點竄向背及波磔出或橐筆
從處或授餐適登山或攜袂衝波或揅楫秋濤淼淼生秋
山弁而突天迥野色晴商聲散林樾異鄉無骨肉感此倍
淒絕嗟予汗漫久天涯爲啼血棲鳥辭故枝驪駒奏廣陌

江右詩集 卷八 一
中途風雨至遽條不能歇我歌憶昔篇柱促絃急迫四座
慘不歡賤子腸如結行行且已矣餘歡未可竭

盛 牧

牧字遠皋武寧人乾隆三十五年舉人

南渡新洲

地勢滄桑改天然一小洲沙痕疑得月水氣欲成秋賈客
靈邊渡河源雨外流垂綸思往事極目爲漁舟

梅林村

山南山北幾株花一角孤山處士家雪月冥濛春正曉
臨水處亦橫斜

張華甫

華甫字松浴武寧人乾隆三十六年進士官刑部員外

東郊別諸同志

一曲還山直到今而今又賦出山吟
乘車已慰良朋願陟屺難安老母心
千里朔風茅店晚五更春雪灞橋深
何時再酌獅崖酒徙倚天街望遠岑

余世蘇

世蘇武寧人乾隆三十六年舉人

張雲洞

闢得煙霞景尋來小洞幽
仙家忘世劫佛影澹溪流
石老龍文古松寒鶴唳秋
從茲吟眺罷深與白雲遊

盛翼

翼字垂雲武寧人乾隆三十六年副貢

石燕巖

石燕不知處此間成洞天乍開先挹翠深入但聞泉雙竇
滴殘雪一門通遠煙月明洲渚上疑是水申仙

江西詩徵卷八十二

江西詩徵卷八十三

國朝

楊殿梓

殿梓號琴齋清江人乾隆三十六年進士官光山知縣著有兩厓詩草

茉莉花

自持綺語戒岑寂對花坐風簾透好香一點塵難浣睡起冰簾中真疑玉簪墮微吟悵倚欄白放斜陽過

薌林懷古

向公舊居

竭來南埭遊耽懷在薌林入徑尚無觀衆香先襲襟當年

秘閣人煙霞盟夙心製得薜蘿衣投老謝朝簪九畹蘭可
佩三秀芝可尋藉草或命酒對花時鳴琴年光漸流換人
代成昔今徘徊風葉中夕陽忽西沉

花圃感懷饒九臯

曾讀蒙莊書返真嘆桑戶來者日以新去者日以故看君
手種花歷此閑朝暮人誰冒雨尋香自隨風度折枝語瑤
鶴無因寄冥路

端午日兒童佩繒製五毒蟲

兒童值端午競佩五毒蟲毒蟲豈可佩意匠由女工我思
裁剪時一燈深夜紅唾絨既點點裂繒何重重物情謔自
摹形製非苟同須臾虎就縛闔闔夸英雄爲虺誰能摧不

是杯影弓得毋螫纖手飛蝸從蜈蚣又訝月裏魂依稀落
簾櫳呼之曰蟾蜍此幻尤難窮遂并蒲與艾紉在衣帶中
竊聞諸蠢動或藏榛莽叢見者辟易走畏惡交心胸胡取
服猛義多費針線功吁嗟荆楚人以斯誑兒童猶如社日
酒強名曰治蠱事謬還襲謬安從問始終達人貴隨俗欲
辨意已慵且登江上樓領畧黃雀風

秋日光山南郊作

逶迤歷南郊俛仰縱遐矚節氣秋轉澄林園雨新沐曉山
出蒼翠平蕪帶寒綠停輿進田父力穡詢民俗我亦耕稼
人釋耒學干祿三年此承乏胡不返初服腰裏已受羈牛
羊在求牧夕照城西頭衙齋坐紅燭

和錢虎川遊淨居山次東坡韻

尋山不辭遠，千仞嘗振衣。自從作吏來，竊茲升斗微。欲窮
靜中理，未息勞者機。昨冬城西南，林葉凋霜威。一接雨花
界，似與塵世違。風際元猿吟，烟中瑤鶴飛。僧房偶同話，別
袂悵輕揮。虎川僻好古，名山發潛輝。將傳後來信，兼証昔
人非。示我浮光編，玉屑何紛霏。吟窓新夢回，前遊尚依依。
終期白蓮社，匡廬攜手歸。

東山待月歌

夕日欲入羣峯紫，清磬一聲白雲裏。穿雲深山山轉深，滿
徑風林落松子。林間曾起讀書臺，名賢勝蹟空蒿萊。商量
舊雨幾人在，尚憶軒窗臨月開。我來山中待山月，幽興還

因山月發山月未上山氣寒山中猿鳥亦愁絕呼童竹葉
傾芳樽蕭然萬籟俱無聞心賞一失不再得拚飲直欲從
宵分少焉月出東山上水鏡澄鮮宛相向愛月添殘勸月
杯入夢瑤華清斗帳

和家恕堂秋風歎

挂壁燈明下羅幙沉沉清夜微寒作金井梧桐早報秋木
葉空堦無數落秋興吟成韻未酬憶君蕭寺日悠悠爲憐
閉門白雙鬢何處看山青兩眸昨朝一雨漲前浦西風吹
冷飛鴻羽雲舍草塘俱夢思綺閣朱門自歌舞平生憂患
涉江津浮名翻悞本來身依然舊院傭書客未起閒園抱
病人與君同注漏卮酒胸中雲夢吞八九會須掘取劍光

寒不使嶙峋空映斗

瓊漿圖壽李蓮塘先生

方丈蓬壺不可到，筠簾何處拾瑤草。一陣天風百和香，人間又見麻姑爪。先生學道師洪厓，與物元氣如嬰孩。有時筆硯自盤礴，茗飲蒙於新潑醅。

先生善茗飲

安用仙家一瓢酒

始堪晉祝千齡壽。畫工之巧吾能知，托物在酒意則否。樂天詩句幾三千，言飲酒者九百篇。此老未必事沉湎，意之所至常欣然。先生獨醒勝皆醉，醉人却失酒中意。我意亦與先生同，喜挹醇醪真氣味。從此三萬六千場，渴來不待吞長江。清談欲仗懸河口，高語義皇坐北窻。

解孝子

父患疽兒吮背父病方瘳兒病瘳隣家火及吾廬母身無恙兒眉枯墓出泉兒泣血血淚才乾墓泉竭嗚呼子道固如此人間獨有解孝子書齋補誦蓼莪篇暗雨寒風裂窗紙

贈金谿李五峯 名卷工書

謫仙之裔湖海客叩門相見若相識自云平生百無好好書池水輒成墨憶昔蘭足遠遊遊千丈羅浮快登陟懸厓石書摹真蹟光氣行囊長奕奕功夫難量歲月深意匠所到風雨逼裝潢大書十二字負荷曾走長安北下士能瞻天子顏高談屢動公卿色返棹西江歲幾更吟席南軒日將昃探囊示我九書歌讀罷爲君三嘆息虹玉幸不終隱

璞雲鸞胡爲尙栖棘百年身世易塵埃終古文林堪寢食
贈君一言與君別劍花墨灑青鬃勒

玉笥山紀遊

嬴秦兩世夸神武謫戍紛紛失門戶十人不歸隆準公占
此清涼一片土接膝山猿徹夜啼駐顏鼎石和雲煮洞天
深徑鎖蘿薜隙地良田種禾黍閱遍滄桑年復年環珮九
人鸞鶴鸞紫霄道士止不去閑話往往逢樵父爲仙何必
遠寰區在地在天咸得所我來泉石偶乘興入山侵曉挈
纜侶是時秋殘不似秋氣候久晴釀炎暑怪底四面天無
風行未十里汗如雨徒然眉睫排翠屏三十二峰皆可數
蒼松斷橋引長陰飛瀑踈簾落香乳試叩岩扉鷄犬驚一

僧罷掃閒庭宇。客餽我山中蔬。邀我登樓日正午。樓頭
側瞰九仙峰。丈量尺計知幾許。奇狀如鑄亦如削。高者似
仰下者俯。或疑列屋建之。旣更類炊鑪。覆以釜。同人少年
足力輕。捫蘿絕壁烟袂舉。我年四十敢云老。百花亭上獨
延佇。憶昔吟詩廬山岑。臨江下指中流櫓。海門潮汐盪胸
生。金山焦山坐客與倦遊。臥病一轉瞬五載。東山守環堵。
卽今稍稍自振拔。登高餘勇看人賈。譬彼會稽越夫人。猶
未忘情教歌舞。徘徊山靄夕陽入。復返南樓酌清醕。三更
假寐不得夢。斜月分明照廊廡。搖林葉想借栖鶻。殷壑聲
疑出嘯虎。須臾紅旭又東昇。心事無端紛萬縷。竊惟此身
在名教時平。况遇

堯舜主卷阿鳳鳴欣載賡仲山袞職寧辭補再宿出山良
有緣一弓買地尙無取笱興在門歸意濃欲別不別留一
語稽首名山十仙人芝草琅玕都付汝

趙順平侯故里

仲謀割據江以東曹氏威行許洛中當時戰守稱兩雄窺
竊神器同不同國賊曹操語至公順平卓識開羣蒙而何
私憤乃興戎先帝弗採臣言忠我嘗讀史欽英風來尋故
居榛莽叢人往事往思無窮立馬躑躅西日紅

題吳赤亭簑笠荷鋤小照

山陰人

漠漠雲垂春晝陰春陰荷鋤何處行前頭桑柘雨鳩喚催
人冒雨勤春耕凌霄黃鶴追風馬先生豈似農家者欲收

豪氣歸隱淪卻寫遐心寄原野一簑一笠聊自娛四顧空
濶誰與徒或傍柳塘尋釣叟更從松塢話樵夫朱門紫綬
誇臺閣塞上凋弓走沙漠富貴功勲能幾時雨中笑指春
花落花落花開雨又晴田疇計日報秋成長歌合買山陰
酒試脫蓑衣醉月明

過晏家河入虎灣山中作

林外寒流溪外山山山窈窕如青鬢昨宵山曾入我夢朝
乘輕騎來虎灣虎灣人家倚林屋山影虛窻翠堪掬每從
綠畝課耕耘未向紅塵問榮辱穿林行行林葉稀白雲數
片侵我衣雙扉隱約開蘿薜一飯慙勤進蕨薇夏畦轉憶
秋初雨稷穗不吐黃花吐如此秋光非等閒且合山中昵

田父我家閭皂舊書堂清曉吟簾挂夕陽一出回頭成小
草滿輪援鏡詫微霜秋思茫茫安可道靜者惟山自難老
別山騶從歸晚衙臥遊繪取屏風好

宿向清城山家

月出人眠四山裏月落山鳥喚人起起看日上東山東山
鳥啼散山更空空山踟躕成小立稍喜山田麥苗碧山農
數人向我語今年夏深苦無雨入冬忍饑事阡陌猶恐明
年不及麥吁嗟山農語何悲我語山農當共知人生饑飽
難預期如彼雨暘寒燠互推移天不爲寒較其冬餒者還
於耕取備胡弗挈家務爾農山農耳語如相喻我亦無言
下山去回首寒雲隱山樹

竹溪歌爲戴山人賦

市亦不必遠山亦不必深卽山開市面溪潄繞溪種竹何
蕭森背我看山入山市探泉竹裏頻停騎溪橋未識主人
誰隱隱茅庵倚蒼翠搗來夢山水臥榻響窓梧山人示我
竹溪圖彷彿再出城西隅疎枝猶疑挂烟月曉漲幾度浮
鷺鳬涵清泛碧午陰重嫩玉搖金清韻俱山人近市山澤
癯彈琴闌徑松萬株友松友竹興兼逸繪山繪水神無殊
我見竹溪畫轉憶竹溪隱片石觀雲緜野涼一竿垂釣迴
塘近昨日山城雨又過林含新潤水微波定知山人聽松
罷環溪四起聞農歌去年苦旱遍邨落千山葉脫寒泉涸
山人衣食勞一身安得閑心寄邱壑始知勝賞繫年豐城

市山林憂樂同明當更尋竹溪去三十里迎香稻風

丙午季秋志館諸君送盆菊賦此以代謝柬

菊制頽齡酒祛慮何當載酒看花去諸君把贈一枝枝猶
帶東籬昨朝露種花我憶碧江潯十載柴桑舊隱心南國
雁聲曉來度西陽山色秋正深咄咄自笑西陽宰桑疇問
俗歲年改陌頭晴蔭幾時垂巖下夕英尙堪采我聞菊在
深深徑殿秋慵與繁紅競蒿艾水邊或叢伍藤蘿月中且
低映逸叟閑尋動盈掬村姬小摘斜簪鬢以斯稱號曰寒
花丹輪寶馬無人訊朱門符竹紛輝光金釵十二排兩行
但解穠華誇近艷安知晚節抱孤芳贈花深意別有托君
予之交淡相約對此豈徒思故人更欲分餐遍邨落去年

邛落秋雨慳生死饑寒荒草間飄殘蘆絮服不煖糝盡藜
羹食尙艱此時菊花竟何有有亦細碎無好顏今年黃梅
不爽候連陰綿綿澤斯透烹葵曲突炊熟餘獲稻糟牀釀
香後便與諸君開酒樽酌花從曉薄哺昏酒情花態交吟
魂西風瘦影回春溫蕪我田園那足論

丙午初冬光城雪錢虎川效禁體疊歐陽文忠公韻
州雪詩韻見示作此奉酌

北風剪燈燼紅萼侵肌如鐵宵衾薄起視濃雲千萬山山
城曉來雪方作今年入冬纔兩旬兩度六出灑寥廓帶雨
初隨霧濛密挾霰翻訝星灼爍庭鋪幾層階亦寒林搖一
片葉兼落出門誰跨過橋驢局戶或伴聚邱貉牛羊郊垆

自蕭散螭虬屋角爭蟠攫邨巷陌馳吠虎處處園亭栖
凍雀臨窻還映麗人鏡埋徑稍妨居士屨我聞農家有占
驗宜麥穰穰歲其樂鴻爪偶有踪跡同螭眼應資水泉淪
莫恨窮陰會十月行報新晴開六漠故人登壇歌郢中何
如牙帳醉橫槩解圍終仗挾天才慚將禿兔俱諧噉

仲冬二十九日復雪仍用潁州雪詩韻和答錢虎川
一陣寒飈掠眉萼些些屋上看猶薄須臾點染城東南粉
嶂峩峩訝天作皇古太素千切彰世界紅塵萬緣廓宵吟
昨妬雨冥冥曉燄侵陵燈燦燦欲辨連邨野燎荒翻疑恣
獵風毛落深潭正好潛蛟龍曲穴誰能出獾貉徑石雲巔
豹怯穿邨亭飯罷烏空攫茫茫宦途走牛馬瑟瑟訟庭憐

鼠雀羊裘却拋臨水竿。鵲磴偏遲陟山屨。感君愛冷不我棄。編帶相期誓同樂。那論入俗泛邀賞。本來無垢何須論。一篇鄉思寫毫翰。再使羈情開索漠。寧辭助容呼酒籌。且共呵手關棋槩。天地春羅智網中。莫遣豪華肆嘲噉。

臘底連朝大雪時。近立春三日也。復用潁州詩韻呈錢寄圃。

水仙欲綻凌波萼。次第春應遍叢薄。先春三日報春輝。四度西陽風雪作。解道寒宵號令嚴。誰知陽氣胚胎廓。同雲靄靄肆週遮。愛日冥冥歛輝爍。平施稍疑垓處私。虛受或向坳中落。遊騎頻疲烏邑驄。敝裘屢易斑毛貉。臥石諱傳獅象蹲。蟄波未放虬龍攫。驚栖林藪輒聞雁。罷訪庭徑可

羅雀多士憐穿講席氊一官笑躡侯門屨松塢猶遲歲晏
歸花城轉愧民同樂許多艷黠且迴避無限泥濘都淪淪
從來本色要清真我輩塵心原淡漠酣吟賈勇破文壘及
使筆如利槩外間剪綵不勝勞話與天公當犬噓

客館聞蟬

客中無鴈字野外有蟬吟寒已微微動秋知漸漸深桑園
搖落恨柳陌別離心惆悵斜陽裏人家幾處砧

午日別墅漫興

地僻堪逃暑涼生一徑風竹分烟外綠榴近水邊紅闌草
邀遊侶聽鳩趁野翁斜陽清興洽還倒碧荷筒

東山寺題壁

并序

釣梭隄畔射鹿江頭公瑾總轄之鄉文成誓師之
處旣通商於闔閩兼聚釋於招提爰有東山號稱
古寺自唐伊始遺跡且百千年距郡匪遙計程則
三十里攬閭皂諸峯之色分臨陽半月之形近市
雖喧簾垂清晝迎賓不俗扉啟白雲乃者風霜歷
代兵燹當年燕不安簷角之巢鶴空占階心之影
幸來知識圖保住持積衆姓之金錢興一時之士
木豈必空山露處方成長老清齋庶幾素履雲生
常接文人慧業然覩經營之跡別增感慨之思敢
向衆生更通一解夫孝子忠臣之廟義夫節婦之
祠足以立懦而廉頑允宜宏規而奠址顧或砌饒

蝙蝠柱產蜂蟪委半壁之龍蛇難與雷雨絆虛庭
之藤葛僅惹烟霞倘不祀其忽諸曾無過而問者
而地連鴛舍景奪魚山飾蘭若以浮華勞波斯之
供給毋亦謂福田利益均沾香國之膏苦海深沉
必穩慈航之渡乎吾黨學宗尼嶧念切君民三綱
五常荷人倫之幹濟六經諸史發天性之文章彩
筆題箋紀臨濟宗風大振絳紗籠壁待王播他日
重遊曷禁賦詩貽諸同志

昔時人選佛卜築到東山水接清江近雲分閭皂閭憑空
花滿院入定月臨關不是鷄林侶無勞浪往還

讀家君子家書

身計年來拙家謀累老親頭顱猶故我生齒漸多人米債
顏公帖書堂畢氏薪晉畢誠然
薪夜讀何時當捧檄不是爲憂貧

聶景蘇文學小照

憶昔攜琴劍荆林間起居到翁栖隱處示我養生書門噪
催耕鳥溪肥飲墨魚一經猶教子庭蔭正蕭疎

重遊玉笥山作

南柯開郡邑北道走邯鄲世網羈人易山鐘破夢難言攜
素心侶興寄白雲端却坐前溪石飛流沁骨寒

數畝藤蘿屋何當卜築成君親恩未報泉石念還輕去去
亭花落年年澗草生青峰三十二隔斷采樵聲

溪灣小步望見閭皂山

溪頭成小立咫尺見青山曉色開圖畫天空聳髻鬟薜蘿
心一往猿鶴夢同閑聞道東峯客丹砂正九還

乙巳冬宿朝陽寺

攀蘿陟翠微到寺已斜暉徑雪晴猶積溪雲溼不飛殘燈
分臥榻落葉打寒扉夢破一聲磬四山人語稀

銅雀臺

銅雀名猶在高臺蹟未荒英雄竟遺臭兒女漫分香孤月
留明鏡殘花學晚粧西陵何處所長遣夢君王

山道上

偶行城市外物候看含芳雨足豆苗碧風吹松葉香宦情
鷄肋似民事馬蹄忙舊有山靈約終當置草堂

解官日口占

久病合歸休吾家近鳳洲千竿臨水竹一葉釣魚舟猶有
心交在差堪舊業求累人名與利往事付浮漚

旅館示張子儉懷饒子維貞二門人

七載西陽邑慙滋簿領塵世寧容冗吏天許作閒人促膝
燈前話回頭夢裏身香爐紫烟近挂席禮山神

秋夜同傅蕙圃孝廉過宿南山僧房雨後步月分韻
得山字

幽賞年年把袂艱偶乘秋色到南山雨餘葉落鐘三弄雁
過星分月一彎近客踈籬危自吹話僧深竹鶴同閒寒燈
任落通紅蕊棋子聲中夜掩關

秋分夜

欲從何處散閒愁作客經年感滯留
日色寒低桐葉外露華香動桂枝頭
頻分東壁三更火又過西郊一半秋
珍重故園明月在也應聞鴈倚南樓

初夏麗藻園作

春歸飄蕩百花香時霽時陰晝更長
滿澗荷風初捲綠一林梅雨待催黃
書堪破睡聊欹枕燕不驚人偶話梁
獨有關心幽事在課童蔬圃耘斜陽

初春再遊閭皂山

披雲曾此事幽尋再款巖扉暮色侵
寒竹風兼泉石響春蘿月擺洞天深
憑誰點簡神仙跡在處夷猶太古心
他日

身閒山許買草廬應得傍疎林

秋海棠

百花誰復競餘芳獨有秋光上海棠自保情根寒亦艷休
嗔色界晚無香一叢淺碧經朝露幾點深紅戀夕陽最是
伴人岑寂處烟藤勾月院東牆

秋雨乍晴用礪巖秋夜見酬韻書懷卻寄

記得空堦罷掃除蕭蕭風雨閉門居晚寒宋玉牢騷賦秋
水蒙莊誕謾書此日晴光徧自好前山爽氣復何如懷人
獨倚芭蕉檻閒數池中玳瑁魚

歲暮舟中和枝山韻

客裏星霜遍歲華江南誰寄隴頭花別離故國還千里意

氣同舟自一家遠樹含烟廻曲渚亂雲將雨落寒沙艱難
莫漫歌行路已有冰開渌水涯

光嶽樓次同年汪雲谷孝廉韻

意疏四面闢玲瓏那信層樓目易窮掌上滄波收潁洞胸
前泰華起虛空晴光比屋黃茅日密蔭連村綠柳風更向
五雲貪望久不知歸鳥郡城東

遊平山堂

山外陰森竹葉風山前深徑畫船通堂開碧落雲屏上人
過晶簾曉鏡中掬翠手霑嵐氣濕攀藤衣挂夕陽紅爲憐
荷沼花時候坐想傳杯六一翁

荒盡征途幾斛塵終朝探討費逡巡縱然猿鳥難留客如

此溪山不負人歸帶樵風蘇熱耳行攜烟月上吟身何當
更發西江棹認取匡廬面目真

麻姑圖

十二層樓望渺冥天風何處降娉婷分明一朵雲開壁想
像三更月滿庭定有青鸞傳玉簡還看綠酒注銀瓶平生
癢處會爬著乞爪當年笑蔡經

送門人張儉懷之潮陽

幾度晴窻笑語同扁舟旋挂滿帆風鴻飛一水悠悠外猿
嘯千山歷歷中桑浦雲看行處碧梅村花想到時紅昌黎
祠廟今何似記取文名百代雄

和家恕堂春日遊東華山用前明袁別駕韻

新泥燕壘未全乾。罷櫛朝來慣不冠。人事疎慵因久病。春
光和煦破輕寒。披雲想到山重疊。盡日經行路屈盤。會向
碧苔蒼蘚裏。同君拂拭斷碑看。

喜聞劉幹齋先生致仕歸里

報到香山致仕初。閑雲相望水邊廬。遣兒昨日纔通刺。勞
客朝來已遺書。舊好叨聯三世久。離心話到十年餘。從今
杖履追陪處。行趁歸樵宿趁漁。

春日攻玉堂宴集偕諸公信宿南山寺感舊書懷

祇園花木漸芳菲。領畧繁香上客衣。須信地偏春亦到。且
拚人醉夜無歸。聽鶯嚶罷還燒燭。伴鶴眠遲不掩扉。回首
廿年風景在。那堪惆悵素心稀。

論文兄弟幾招攜自愧風流遜阮嵇
醉髮難濡因斷飲吟
髭雖在怯分題聞鳩又喚青疇雨待燕方融綠徑泥料理
春光敢相負柳塘飛絮撲簾低

將入玉笥舟至漳口

秋山何處問崔嵬一度秋風江上來
有約將從瑤鶴踐無
心豈受白鷗猜菰蘆小艇同人在蘿薜深扉待我開夕照
栖烏漳口驛酒帘村店潑香醅

雨後入鄉

渾忘炎暑釀三庚郊野陰陰減從行遠岫雲含殘雨色連
阡水瀉落潮聲占年合許童謠採隨俗慚書上考成竟日
豆棚延解帶歸來燈火照山城

西陽秋郊

秋雨經旬始放晴晴郊秋色倍分明山皆染黛如眉列水
自恬波似掌平數點中田鴈鵲影一行疎柳螭蛄聲更聞
笑語村村遍穫稻人家報順成

丙午季春以公務至沙窩保轉吳家河過晏家河在
山三宿始返署

幾日山行不出山好春無限在山間草塘釣石青蘋漲茅
屋人家綠樹環應候初聽蛙角角喜晴頻報鳥關關竭來
袖裏香風滿拾取瑤花戴月還

丙午初夏畢中丞率同僚屬登平臺看麥紀賦

古汴城東古吹臺河光嵩色畫圖開金隄小婦求桑罷玉

佩中丞看麥來滿坐清風生履舄萬家靈雨潤蒿萊勝遊
忝與梁園會誰是鄒枚作賦才

盧維藩文學以萊花詩見寄爲和答之

機事誰能息漢陰一番春色野園深年來得暇歸蔥肆晝
永閒香在韭林或與荷鋤人共立更無騎馬客相尋忽勞
遠寄評花句又剪宵燈不廢吟

秋暮和答盧維藩文學

稍喜紛華染慮輕最濃惟有看山情徑分寒竹三竿綠池
引飛泉一道清對榻幾時雞解語杜門終日犬無驚秋風
鴈字雲邊至慙及西陽舊吏名

與諸子遊大覺寺和盧瑞幕

六吉

太學韻

江表言集 卷之十二
入社希靈運居家未出家招尋蘭若近行繞竹籬斜老鶴
鳴深澗寒鷗下淺沙禪扉頻自叩談麈看誰誇迎客方通
款開筵且示奢百斟成酩酊一飽勸羅闌徑冷松交菊園
荒菽與麻無聲宣貝葉久坐落藤花潑墨書慚米徵歌曲
笑已所欣同志洽還覺寸陰賒亦足消塵劫何須轉法華
歸途人把袂日色挂殘霞

春閨

揭簾理針線春織屢怯寒斜陽蕉影瘦獨倚畫闌干

薔薇花

路旁春易老墻角蔓初纏記取花時節來輸買笑錢

午日卽事

勝遊何處約一雨到昏黃
清簾疎簾裏時聞艾葉香
養疾頻支枕辭喧穩閉門
擎盤青簪粽兒女報開樽
笑語耽長晝深閨刺繡停
欲誇珠一斛池上捉蜻蜓

和邵飛飛薄命吟

憶將螺黛畫雙蛾蛾翠銷沉奈若何
試聽新翻堂上曲分明是妾舊時歌

江行卽景

東風吹雨過清明江上烟綃百丈橫
喚買輕舟搖櫓去青山兩岸鷓鴣聲

村景

近村車馬過來稀小立園林雨濕衣
山笛一聲雲影亂老

農蓑笠叱牛歸

哭同懷兄月堂

與君文字有因緣坐煖樓頭席上氈過眼一氈寒半席不
成花萼玉溪編

秋山秋水昔登臨綠酒黃花兄弟心欲把茱萸隨例插漫
天寒色隴雲深

僧絃聲惠雙履爲還其履作此答之

持贈殷懃一片心月明誰共踏花陰臨風還寄安禪處得
助詩僧繞榻吟

遊倦歸來四壁貧芒鞋猶帶九齡塵而今任決原思踵不
是邯鄲學步人

我似風萍不定踪
深林輸爾緩支筇
終期入世心情了
脫屣來聽講座鐘

秋日過紫荊菴訪紘聲

何曾深徑剪蒿萊
兩度禪關爲客開
共倚斜陽成一笑
隔溪風葉到門來

甘羅城

十二年華列上卿
一時謀詐起功名
秦宮已付咸陽火
豈得甘羅尙有城

悼亡詞

試院秋風報罷初
典裘沽酒愧相如
感君一語猶堪佩
郎自乘閒好讀書

蓼莪詩句不堪裁兩度麻衣共我哀此會尊嫜應待汝螺

山魂魄問安來

先考妣並
葬螺山

偶占

獨立閒階草色深春風不見蝶來尋日長又過花磚影觸
撥長楊獻賦心

七夕署齋小集和韻

何處針樓好倚欄晚風天氣入新寒吟心正與秋相待驗
取桐窻一葉看

曾廷樞

錢塘吳錫麒填諱

先大夫字春侔號文本世居南城乾隆四十年進
士由庶常改刑部主事陞員外歷任曹州濟南知

府著有靜香齋詩集

短歌行

愁雲蔽野日短西馳南山有喬無樹涕洟當飢無食當寒
無衣弗食弗衣父莫之知父莫之知兒何以爲東西比隣
各各生兒長而訓迪幼而提攜荇菜無根猶水是依惟我
不造煢獨如斯人恒有言如汝姿眉生不識面夢寐差池
天乎天乎父兮父兮

挈口驛守風

遠道心無著蒼茫寄此舟危檣穿小罅亂石破橫流天地
孤征客山河一片秋歸思如水急風伯苦淹留

黃州送龔五未山公車

一帆殘雪抵黃州與汝都成汗漫遊如此山川還作客幾
時風雨罷登樓余時臥病兼旬半生未得文章力三策應關社稷
謀憐我江潭憔悴久沙頭瓶酒爲遲留

同舟郭某索尊慈冉節母壽詩

共倚青蓬十日緣龕陳母節各潸然兩家相隔二千里一
樣撫孤三十年報

國文章歸荻畫懸門棘矢念薪傳春暉寸草情何極美汝
稱觴藕似船

出都紀懷

木葉下寒波歸與意若何壯心當白日長嘯渡黃河酒渴
憑中聖霜濃渚太阿未須屠狗識吾不是荆軻

鹽包 有序

天津饒煮海之利瀕河十餘里鹽積阜土人以鹽
包名管子謂海王之國謹正鹽筴由是齊富甲天
下今諸商半窮乏者豈策算不工抑甘食好衣與
弄倡優游媚富貴甚於漢志所云也八月十四日
舟次郡城晤王穆門中翰拉與騎馬走觀旣返舟
念天地之生財知豪華如逝水因時感事援筆賦
之

燕都析木之所屯負海鴻鹵爲津門萬竈驟除積冰雪簪
裹鱗疊高園垣連騎出城踏斗磬乍見箇蠢疑蹲黿却穿
間路遶鹽筴包茅屹屹堆連邨迺知山海無盡藏自然之

利伊普存虞夏入貢等龜貝後來離政紛更煩齊糶以吏
贍和賦其民濶達生意敦漢興大農乘傳始熬波例給官
牢盆宏羊浸用平準法要使漑釜纖鯁吞造物生財只此
數賣貴買賤誰堪論我

朝恤商薄其賦便民食指真

殊恩畫地專場鑄鍋鐵分引各路均厨餐稍視盈虛定售
值童子造市難爲緩就中大估工筭計青紅捆載千蹄健
廢居居邑國有禁蹠財乃或窮陶甌手持印帖走州郡寫
誌名號飛旗旛設卡通津截國販多金欲涉鴟夷藩日啖
芳甘裂紉綺彈弦跼躑蜂房喧舶趠風迴致方物琪花翠
羽羅庭軒邑里貧兒却東餓瓶無儲粟寒無禪踵門泣告

那肯顧姚彭百斛傾潺湲坐擁奇羸卒銷耗其流不節省
其源物盛則衰理可據寶珠無脛思騰騫我欲繩之返淳
樸其奈與俗殊鹹酸人富而後附者衆子長灼見非空言
不見水西盛賓客水西莊查蓮坡老人別墅暝禽噪樹今荒園行人勒
馬念陳迹柳絲拂帽秋闌珊

鄭家口阻風

白帝真輪赤帝威炎風吹浪打窻扉隨時且擬鵬搏息壯
往應防鷁退飛霜葉捲邨楓樹暗練花堆雪鯉魚肥神工
若與秋颿助滕閣文能迅筆揮

巢父墓

在東昌府

文思如帝堯可以出而輔鴻飛何冥冥孤往儕許務世無

稷禹賢君等持何具幸伊水火平安此烟霞痼區區表高
風過客拜古墓

渡黃河

天潢一綫下崑崙地軸千盤到海門竹塹堤高奔駱馬桃
花浪暖踏魚鼉北條自古青徐患南顧頻年
聖主恩萬里葱山星宿近欲乘槎去問真源

過高郵州

細雨秦郵路紅橋接斷隄鐘聞寒樹外驚掠野塘西水濶
浮城動船高壓屋低袖中淮海集吟以酌玻璃

寶帶橋

震澤三萬頃泥茫浸吳會東流入泖淞橫江盤寶帶連環

五十三紐鎖黑蛟背日月浴其中魚龍戲于外往來方習
坎吞吐擬資兌憶昔八閩遊跨海洛陽最巋然五湖間勢
敵均楚蔡居士苦郊窮側身嫌莒隘行經萬里遙始信九
州大西望靈岩峯晴空擁芝蓋下映玻璃澄浮圖插青靄
我欲馭高風放眼閱人代帆飽不留人已失長虹在

還家四十韻

經年走燕薊買棹今來歸且行且念家事事驚且疑朝來
見衡宇庭樹含餘滋江棗撲已荒橘猶黃累累晚烟飛屋
角中厨想有炊老母出堂闔見兒喜且悲悲我彈鋏歸喜
我歸及期謂兒遠行役我恒夢京師汝兄虔州去泪眼尤
暗垂念伊木訥性病骨須護持兒更急聲華恐綠世味移

古人素餐愧服官垂白時早達豈云幸霜梅橫老枝娘衰
仍健飯未用憂攢眉兩兒迎我笑擁髻頑而癡老師最和
緩暖若春風吹讀書日十行夏楚弗兒咎諒我貰訶責雙
雙來挽髭翁從冀郤還結束輕羔皮兒方襪底裂待買青
溪絲座環三世人酌酒貪娛嬉喁喁老幼語南北兼談資
我母安寢旣我還身入帷憇坐倚床第山妻前致詞君遊
天北極梁月更圓虧欲爲錦字寄南雁翻參差因循夏迄
秋姑食惟饅糜偶然具魚菽含弄到孩提寒飈迫冬景懸
罍空屢屨債主昨叩門子母百金貰駢集俟君至君庸能
刀支洗盞供我茶手輒如束龜更謂姑生日明當介匏匱
二歎感婦言處約多乖離苦心汝所喻此外燈花知我夢

由

主聖汝勤得姑慈且應勵窮節忠孝爲畚菑親知苟寬重
寧嫌報李遲不見蘇季返裘敝容顏黧然膏清夜始朗誦
義文辭

過陳園溫大夫寓宅

綠酒紅燈舊醉場更誰投轄賞春光軟風吹皺東湖水一
樹辛夷對夕陽

上十八灘

萬安縣南境積鐵列厓嶂劃開青玉峽險側瀉清漲初聞
聲激楚倏起雷大壯獐龍捲飛雨倒注懸壁上散爲萬斛
泉照眼雪飄颺綿亘二百里怪石互雄長立如冠巨鼇蹲

若洗馴象又疑閭闔敢劍戟嚴磨仗其下閼深黑神姦所
依傍大蓼特崖柴小蓼相墜抗崑崙武索間濫瀕瞿唐仿
長年理戍檄天關局不放曳綆猿掛簾緣厂廳穿壙十步
九鷁退責勳氣凋喪鷗鵠惜行役似助邪許唱却看下瀨
船箭劈入高浪我生故蹇屯常恐狐濟妄如登欽古訓躁
進安可尙北風忽颺颺飄轉達空曠漉酒贛江清豪吟答
嘉貺

廣州郡幕寄梅牧臯

嶺雲中斷粵西東檣散誰人念鄭公病過海棠頭已白書
來江館蒨初紅君詩有雪留蠻布此地無冰語夏蟲捫蝨
而談自高雅未應希逸怨東風

焚紆愁緒那能捐倦擁書堆且晝眠葬母淮陰無寸地方

先慈謀兒莊嶽漫經年

兒子炳隨侍讀書

此心難比月圓滿於爾

更傷花反偏他日相攜訴枯槁沿江楓葉北歸船

王選亭同年詩稱龍門縣署山光之勝次韻奉寄

山縣宜詩客屏開列岫光鐘聲酣萬谷髻影過重墻此地
煙雲妙先秋枕簟涼從君頻有夢道遠亦蒼茫

七夕遇雨

伏雨闌風水殿寒雙星何處足清歡一宵未放秋光好莫
怪人間遇合難

送于晴川歸鎮江

佛桑紅照酒相見惜餘春各有纏綿意都爲澹石人江湖

諳世事貧賤重吾身愁似瀧流曲如何可具陳

作客四千里還家十一年寒欺衣笥薄詩壓酒船偏節物看如此功名聽自然來朝望江水京口渺雲煙

南雄寄陳伯恭同學卽次送行原韻

韶石環江水抱山青巖巖下玉琮潺雪花有約依愁鬢楓葉相欺門酒顏薦藻崇祠問平園騎驢細雨入梅關寒瀧尺鯉頻械寄筆底高談尙可攀

廬陵拜歐陽文忠祠有感

昌黎以後數歐陽文字如公味最長留得無聲並外指南
豐門下是孤芳

崇公遺訓最關神寸草難將報去春太息瀧岡盡新表荻

書無復鄭夫人

哭六弟青貢

客死河南夏邑時本生母及妻與弟俱在夏惟父與嫡母二棺在家耳

父死不藁葬母死空總帷落魄大梁都戮戮胡久羈嫖姚
爲光拜西河與衛辭行事誰得失憐汝懵不知弟出門時父棺在堂
嫡母老猶健飯家人不知其赴豫也今者有傳說汝又終天涯寡妻泣閉門

手摩遺腹兒聞此輒痛哭旣復甚然疑天子叔與母而忍
其餒而憶昔抱經史聯翩從塾師咸謂頗清發計日成文
詞夷門去不還伊戚汝自貽汝病何疾苦汝歿何日時有
母汝所生有弟汝連枝于客爲死別自家乃生離尤汝復
痛汝望隔芒碭陞大福山青岼野江水碧漪先人所廬墓
存歿歸則宜何年取汝喪魂兮且來斯

假滿入都留別家兄舍弟暨親友次陶適齋贈行韻
行年四十拜

皇闈笑插朝簪髻雪微野馬乍收歸玉勒貧兒遲嫁試銖
衣綠窻引燭攤書滿紅粟傳餐押款稀

四庫館官飯設簿
畫押子入血未久

遂請
假歸記別

禁城春欲老楊花糝逕送征驂

故山茅屋翠周圍小住匆匆不當歸春草塘邊詩夢遠暮
雲江上酒人稀敢誇報

國文章在直恐歸田歲月非約共蓬萊看清淺驪歌催我

素心遠

今春有約遊
麻姑山不果

鵬字搏南號東山南城人乾隆四十二年舉人挑發直隸知縣署阜城尋卒

舟中晚興和張大秋崖

昨夜秋風起孤舟生早涼鄉山正迢遞客路易星霜岼草迎秋紫河流過雨黃懷人無限意露白與葭蒼

濟寧州太白酒樓

秋色蒼然滿舊城危樓獨上勢崢嶸如何勝蹟空千載不與前賢共一觥檻下江聲終古咽簷頭月色爲誰明卽今豈是無高士愛客長懷賀監情

秋夜有感次韻

亂蛩綠底急併作苦吟聲燭暗頻垂淚宵長不肯明迂疏

全我性閱歷見人情何以驅愁陣孤懷對麴生

途中卽事

維舟大道旁流民遍遠邇呼號涕沾襦舟前競長跪自言
歲游饑室家各轉徙春旱旣無收秋又苦蝗蜚蠲賑豈無
令往往飽胥史豪門厭膏粱窮簷艱糠粃吁嗟誰長吏聞
之心惻忤稍稍傾我囊噉蹴何敢爾接踵旋紛來囊中愧
無幾徧及固不能置之情難已小惠古所譏事貴持大體
我今落拓歸蒿目空相視身無尺寸權依人方自耻誰施
漂母飯空索東方米夙懷四海心而憂一身餒飢溺有同
悲誰能久對此日暮解纜行蕭瑟悲風起

湖南舟中

桂檣蓀橈事遠征。儻回口日楚江程。山連百粵天然秀，水到三湘分外清。野浦何心芳杜碧，深林幾處暮猿鳴。溶溶雲氣冥冥雨，猶見離騷萬古情。

過衡山縣問舟人烟霞峯竟無知者

卽李泌遇懶殘煨芋處

一棹夷猶楚水濱。江蘿薜芷有餘芬。湘流東下平如鏡，衡岳南來半入雲。何處烟霞尋鹿苑，終朝風雨狎鷗羣。自知食肉原無相，敢望高僧半芋分。

寄吳二照南

誰與玩芳草，故人天一方。鷓鴣聲裏路，獨自到衡陽。雲氣溶溶合江流，浩浩長憶君舊遊。此風雨望蒼茫。

抵桂林

旅程今兩月初到粵西天細雨辰山樹輕風癸水船嶺猿
呼客語塞雁背人旋四望雲千疊鄉園何處邊

鄧之澄

之澄字萌春南城人乾隆中貢生

別吳煥儒

佳會不能久褰衣涉前津爲我少留意多謝山中人盈盈
隔江水脉脉欲傷神

感興

偶爲閑遊過別溪來經石竇拜菩提寺多古木僧危坐人
下蒼山鳥亂啼日脚斜行青嶂逼泉聲陡落白雲低頻驚
心事千年後獨對春風感舊題

忘機鷗鳥下平田十里西山起暮烟流水斷橋明月夜故
人芳草白雲天才名空羨何平叔踈曠終慙魯仲連好共
滄浪一釣叟桃花春泛木蘭船

余之梅

之梅字臥夫金谿人乾隆中諸生

塞上曲贈馬贊府

長劍輕裘徼外遊身騎騮馬下邊州風雲自起中軍帳霜
雪曾披六月裘戰士淚流聽箠策蠻歌聲斷倚筇篻歸來
醉語當壚女如我功名正黑頭

贈車養澄

車君平生與我好疲驢共上邯鄲道一枕三年夢不成潛

潛冷淚零芳草君之詩才詎等閑
叅居大歷錢郎間清奇
婉麗非一態若吹玉笛搖珠環
手寫琳琅百餘軸不走京
華走巴蜀巫峽猿啼萬里船
垂簾欲賣君平卜歸來著屐
香桄顛三市煙花醉管絃
右軍池頭洗鐵硯墨龍吹浪騰
高天囊中尙有生花筆可惜顛
毛不如漆仙人家住鳳麟洲
須馭紅雲追白日

送顧廉鎮自蜀乞假還江南

西風一夜動歸思
擁鼻呻吟楚客悲
益部三霜凋玉節
陽關疊雪倒金卮
浮雲隔隴驅征馬
落日橫江照大旗
料得蜀中諸父老
錦城應與立生祠

初秋雁影拂岷岷行到江南及小春萬里青羌回權客一

雙白髮倚門親原同皮陸稱中隱暫伴巢由署外臣莫戀
五湖鯪菜好

清時未許作閑人

李文典

文興字起園南昌人

山中卽事

微雨夜來息寒星吐餘輝臥看嶺上雲傍我簷際飛蟲以
夜作晝羣鳴恐後時愁人獨離憂披衣爲嗟咨哀樂迭相
感切切無盡期

壯士不長戚隴畝有餘情寒山日未出喈喈倉庚鳴我始
荷鋤去隣人已羣耘勤情反內愧慨然念平生貧士不干

江西詩徵

卷八十三 國朝十九

无

世飢渴聊自營

彭曰堅

曰堅字北山南昌人

送春

君歸何處去有客尙飄蓬
留別情何在遊人思不窮
家書難付托風景各西東
朔歲來遲早先期報老翁

五羊城遇巫麓筠同往粵西

未得君消息因何早挂冠
廿年勞夢寐一夕話艱難
華髮因誰白童顏耐醉看
酒醒思往事劒鋏不堪彈

裴元謙

元謙字地山新建人

人日春懷

招搖轉矢東荆樹生春氣華茂各以時於人本無意如何
感傷根一朝獨顛顛縱然不能言榮枯爲誰寄冥告有心
人植物固多智

江西詩徵卷八十三